

**Quaestio medica ... an anginae gangraenosae emeticum? / [Antoine Garnier].**

**Contributors**

Garnier, Antoine, -1778.  
Boulland, Toussaint Gilbert.  
Université de Paris.

**Publication/Creation**

[Parisiis] : [Quillau], [1750]

**Persistent URL**

<https://wellcomecollection.org/works/aakv5gut>

**License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>





DEO OPTIMO MAX.

UNI ET TRINO,

VIRGINI DEI - PARÆ, ET S. LUCÆ  
Orthodoxorum Medicorum Patrono.

# QUÆSTIO MEDICA,

QUODLIBETARIIS DISPUTATIONIBUS  
*manè discutienda, in Scholis Medicorum, die Jovis decimo-quinto  
mensis Januarii, anno Domini M. DCC. L.*

M. TUSSANO-GILBERTO BOULLAND,  
Confiliario Medico Regis ordinario in ejus Castelleto,  
Doctore Medico, Præsidente.

*An Angina Gangranosa Emeticum?*

I.



T à Mechanicâ corporis humani, certis legibus, ac diversimodè ordinatâ pendet sanitas, sic à pluribus diversisque causis procreatur morbus; ex multiplici enim fonte exurgit, intus sic & extus oppugnatur homo; nulla ipsius ætas à morbis libera, nulla illius pars, quam morborum agmen non invadat; undiquè serpit mors, alii seriùs, ociùs alii maectantur, alii illo, alio alii morbo tolluntur, & quasi satis non esset singula humani corporis viscera suis cruciari morbis, quasi non sufficeret homines tot modis orco tradi, alia deteriora, frequentioraque ingruunt mala, quæ ubiquè periculum invehunt, nec temperamento,

A



nec sexui, nec ætati parcent epidemicè sævientia, sed inter morborum epidemicè hanc, illam regionem infestantium familiam, eam numeres Anginæ speciem, quæ hanc urbem Parisiensem anno præterito insolentibus symptomatibus irrupit, juvenilem ætatem repentè insultavit, fœmineumque sexum præsertim aggressa est; plures paucis diebus laceravit, necavit celeritè, contagiosa, & funeribus famosa illa lues; pueri quos intra sex vel octo dies occidit, videbantur illius deliciæ, eò quòd debiliora illorum sanguinis principia, hebescentes solidorum potentia, debiliorque corporis textura morbi epidemicè grassantis efferos motus, & incendia non potuerint sustinere; aliquandò post primos furoris insultus velut mitigata illa lues, aliquantenus inducias facere visa est, sed de novo, quasi ex conducto repullulavit, & quos simul torfit, nusquam deseruit, nec suis cruciatibus immunes dimisit; ab eâ immani Anginâ jugulatæ sunt puerulæ quibus parcere videbatur; diebus octo ægram sublatam vidi, constante mente, integrisque sensibus, cujus aperto cadavere, interiores faucium, laryngisque muscoli phlegmone, maculis albis & duris, seu potiùs crustis, erant vitiiati: rubor obscurus se prodebat conspicuum ad internam Trachæ Arteriæ membranam usquè propensum, qui Gangrænâ evidentem nobis significavit & patefecit.

## I I.

**A**B aurâ salino-sulphureâ perniciosæ mobilitatis proficisci Anginam, quæ grassando urbem Parisiensem peragravit, non temerè dixeris; totum aerem inquinatum idcirco non asseras; sed, certis de causis explodi & volvi, donèc in hunc, vel illum locum procumbat illa aura, sic intactis locis, in uno commoratur, sic relictis intervallis, longè, latèque se diffundit, nec est omnibus æquè perniciosa, sed vires suas præsertim exerit, & morbum producit, ubi adest ad concretionem, & spissationem in humoribus propensio, ubi adest in fibris ad relaxationem pronitas; illâ ratione, senibus & adultis parcit, pueros, puerulas potiùs exercet illa Anginæ species, lympham primò aggrediuntur innumera, oculos fugientes, in atmosphera nostrâ diffusæ maligni moris salinæ particulæ, quæ cum aere inspiratæ, in internos oris, palati, faucium, laryngis parietes impingunt, ex quarum impulsu in tenuissimas gutturis membranulas, per glandularum salivalium porulos penetrant, se salivæ immiscent, ex ore fauces subeunt, tenues, & exilissimas musculorum, glandularum fibrillas pungunt, corrodunt, lympham in illis sistunt; nullæ gutturis partes, glandulæ tonsillæ, maxillares, harumce pravi moris particularum impulsu sunt immunes; hinc magis vel minùs divagatur malum, variaque prodeunt symptomata, pro varietate affectarum partium, prout violentiùs, vel segniùs interiores, vel exteriores faucium partes oppugnant, tantùmque in his non nihil corrosivi salis-ve acidi immixtum, quantùm sævitia in multiplicibus symptomatibus dicas; causa certè singulari observatione digna, cui tam in statuendâ morbi diagnosi, quàm in convenienti medicamine eligendo maximè consulendum est.

## I I I.

**I**N majori ægrorum numero, id Anginæ genus constantiori hoc se prodit modo, ægros repentè adoriuntur gutturis calor, linguæ magis, vel minùs spissatæ dolor, uva excreta, & in longitudinem porrecta ad fauces serpit; primis diebus febris perexigua videtur, macula alba Gangrænæ prænuntiâ amygdalarum alterutram cooperit, aphtam similitudine repræsentat, nec inflata ad fauces, uvam descendens iâ larynge ad membranam pituitariam panditur; tribus vel quatuor diebus elapsis ingravescit malum, intenditur febris, os tetro odore, qualem præ se ferunt spiritus urinosi volatiles, inficitur, & alios inficit; humore acri & putido tument glandulæ; macula spissatur, indurescit, & in crustam convertitur, quæ brevi exsolvitur, ut alia subjacens exeat; adaugetur febris, nec persentitur in pulsu durities; è naribus fluit sanguis, balbâ nare loquitur æger, pallet facies, conduplicantur carotidum ictus, ægrotus gravedine laborans frequentè emungit, ac solam pituitam



per narēs emolitur, progreditur ulcus, per Trachæam Arteriam serpendo Pulmonem pervadit, angustior fit spiritus, Gangrænâ Pulmo afficitur, antè nonum vel decimum diem vita extinguatur; longiùs, latiùs, tardiùs, vel seriùs diffunditur flagitium, pro vi causæ morbum proferentis; non nunquàm extrinsecùs observantur tumores, instantur parotides, constat febris, forbent, hauriunt facillè ægroti, rectè deglutiunt, nullamque sustinent sitim; humida est, velut sanorum lingua; valdè fætent illorum excrementa, nigroque colore inficiuntur; adultis, senibus neglectis, pueros teneræ ætatis, & infrà annos quindecim potiùs adoritur illa lues, ut potè qui sint habitùs calidi, & humidi, irrequieti, nec non ad motum celerrimi se consistere non valeant, quia edaces, & potulenti singulis momentis esuriunt, & sitiunt, sic largioribus cibus & poculis indulgent, eò quòd sint texturæ laxioris, mollioris, hinc aeris intemperiei, & maleficiis obnoxiores; lympham primò inquinari, satis est argumenti, quòd pueri ferè soli, vel saltèm antè omnes hâc labe inficiantur, eò quòd lymphâ affluant, ac proindè vasis ipsam continentibus, adultis, senibus-vè præstent, undè citiùs percutiuntur, citiùs victimæ mactantur.

## I V.

**A**NGINAM Gangrænosa à rarefcentiâ exordium sumere ne dubites; lymphæ turgidior, mobiliorque facta, ubiquè vasorum arietat, subtiliores illius partes dissipantur, celeriori, promptiorique fugâ cæteræ dissiliunt, solidorum sine lege colluctantium multiplicantur impetus, statim atque hæterogeneæ aeri immixtæ particulæ, necnon cum aere inspiratæ ad lympham pervenerunt, velut totidè igniculi subvertunt illius compagem, illiusque circuitum retardant, præpediunt, undè morbus ille vires adipiscitur, putredinis fomites, futuræ Gangrænæ vel Sphaceli signa, ut probant tot ægotantium hoc morbo extinctorum funera; necnon Cadaverum apertura; venenosum hunc halitum faucium glandulis, musculisque primò insultare satis, superque declarant invadentis morbi symptomata, irritatis enim crispatisque Nervis ab insolenti venenatâque aurâ, lymphæ, sanguinis impeditur circulus, in minimis præsertim tubulis nectunt moram, in illis lymphæ momentum crescet, tumens magis, majus spatium occupare conabitur, major illius in tubulorum parietes nifus, fortius, crebriùs contrahentur illorum tunicae, undè tot mala, ipsa mors, producuntur: in eo præcipua versatur Medici sagacitas, ut acutè judicet de morbi ingenio, necnon auguretur ex symptomatum ferociâ, ne illum fugiat morbi indoles, ne illum ludat symptomatum dolus; exploranda imprimis morbi natura, perpendenda symptomatum magnitudo, ut votis respondeant adhibita Medicamina; occasio celeritè, dùm se præbet, arripienda; cunctari sæpè fit nefas; incipiente igitur morbo funde sanguinem, repetitisque vicibus funde; depletis majoribus vasis, in febris remissione stibiato tartaro submoveatur ventriculus. In Emetico reperitur medicamentum, conglutinatis hærentibusve succis congener, & ad ipsis pristinam conciliandam fluiditatem idoneum; naturam hujus remedii si explores, saponaceum est, sulfure antimoniali & sale alkalino confectum, crassioribus humoribus attenuandis, subigendis aptum: in magnâ dosi adhibitum tanquàm Emeticum purgans per os & intestinorum cribra, crassiores succos propellit: in minori dosi usurpatum, solvit lympham & humores, diaphoresim promovet: nec febrem ad-augēt, nec fluida periculosè commovet, nec perturbat secretiones, quantum profit in morbis acutis evincit experientia. Hâc arte lymphæ & cruoris circuitus in gutture tolluntur obices, humorum in primis viis stabulantium egestione, noxia quæ febrem adaugendo, lymphæ motum subverterent, putredinem parerent, his præfidiis propugnantur, arcenturque.

## V.

**M**ULTO magis expedit succorum redundantium imminutionem Phlebotomiæ, Emeticis, quàm naturæ committere; celere, & proficuum remedium



exigit illa lues; cave igitur ut quæ usurpaveris medicamina, symptomatum sævitæ respondeant, quò sanguinis motus intensior, eò potentioris energię seliges acida; quò maculæ albæ plures erumpent, eò sæpiùs subduces alvum Emeticis; quò pulsus frequentior & elatior, eò generosiùs mittes sanguinem; sed ne fileas, ne te decipiat dolosa tranquillitas; relictos iterare cursus, fucatâ quietis imagine, non rarò meditatur tam perfida ægritudo; quæ foris extincta apparebat, vires intus, & clanculum causa recolligit, mōx datura deteriorem symptomatum progeniem; à remediis idcirco non abstinendum, nisi crustæ albæ, suo defraudatæ pabulo aruerint, nisi cum illarum lapsu interni ardoris testis odor pravus, sanguinis è naribus stillicidium simul & balbuties evanuerint: at si febris primis diebus sola decesserit, non ideò fide signo mendaci; aliàs quæ tibi nimis credulo imposuit tranquillitas, novis supervenientibus maculis albis, recrudescente morbo mortis ægri causa erit; his in angustiis ad Emeticum tanquàm ad salutare præsidium confugas, ne lymphæ turgidior explosione factâ, tenues faucium & laryngis tubulos citò dirumpat, & ibi funestos sibi pandat exitus; Medici est abdominis claustra referare, stagnantibus liquoribus vias minùs periculosas aperire per emunctoria ventris; nam statim atque ad expulsionem humorum ventriculum, & intestina sollicitavit remedium, jam mitigantur, & recedunt, quæ metum instantis lethi incutiebant symptomata; urgente verò febre cum certâ pulsus duritie, manante è naribus sanguine, altera macularum in gutture eruptio, mittendi sanguinis præsertim è saphenâ arguit necessitatem; sed is sive largo flumine, sive repetitis vicibus educendus, ne majori rarefcentiæ detur locus, ne exhauriantur vires, ne remittente febre, decrefcentibus symptomatibus, recrudescente iterum morbo, maculæ novæ idem suadeant; acidis liquoribus largiùs indulgendum, si molesta non sit tussis; ut autem Emeticum prosperè succedat, eo ipso momento propinandum quo remittit febris, quo arcenda putredo; à putredine enim erumpunt maculæ albæ Gangrænosa, sanguinem putrescere nullus inficias iverit, nisi quem latuerint illius principia; sed quid ratio-ciniis, vel verbis opus est, dum se sensibus putredo præbet aspectabilem, dum putredinem exhalat os ægrotantium, & dum virtutes Emetici à Medicis cognoscuntur?

*Ergò Anginæ Gangrænosa Emeticum.*

## DOMINI DOCTORES DISPUTATURI.

*M. Ludovicus-Alexander Vieillard.*

*M. Carolus Dionis.*

*M. Michael-Josephus Majault.*

*M. Ludovicus - Guillelmus le Monnier, Consiliarius Medicus Regis ordinarius Regiique Nosocomii San - Germani in Layâ, Regiarumque Franciæ, Londinensis ac Berolinensis Academiarum Socius.*

*M. Gedcon de Rabours.*

*M. Antonius Ferrein, Professor Regius & Regiæ Scientiarum Academiæ Socius.*

*M. Josephus-Exuperius Bertin, Supremi Walachiæ & Moldaviæ Principis Medicus ordinarius, & Regiæ Scientiarum Academiæ Socius Veteranus.*

*M. Laurentius Ferret.*

*M. Bartholomæus Murry, Rei Herbariæ Professor designatus.*

Proponebat Parisiis, ANTONIUS GARNIER, Lingonæus, Doctor Medicus Remensis, necnon Saluberrimæ Facultatis Medicinæ Parisiensis Baccalaureus, A. R. S. H. 1750, à sextâ ad meridiem.